

碧

雲

集

碧雲集卷中

江館秋思因成自勉

江邊候館幽汀島暝煙收客思雖悲月詩魔又
愛秋聲名都是幻窮達未能憂散逸憐漁父波
中漾小舟

贈胸山楊宰

訟閑徵賦畢吏散卷簾時聽雨入秋竹留僧覆
舊棊得詩書落葉煮茗汲寒池化俗功成後煙
霄會有期

廬山

控壓潯陽境崔嵬古及今勢雄超地表翠盛接
天心湓浦春煙到星灣晚影沉圖經宜細覽題
詠卒難任靖節門遙對庾公樓俯臨參差巖
峭拔推雙劍清虛數二林白蓮池歸洞穴深谷
宛在翠輦事難尋天近星河冷龍吟
春攢錦繡石潤疊瓊琳玄鶴傳僊拜青猿伴客
吟泉通九江遠雲出幾州陰冬有靈湯溢夏無
炎暑侵他年如遂隱五老是知音

送孫霽書記赴壽陽辟命

辟命羨君赴其如愴別情酒闌汀樹晚帆展野
風生淮靜寒煙斂村遙夜火明醉沉胸嶺夢吟

達壽春城舊友搖鞭接元戎掃榻迎雪晴蓮幕
啓雲散桂山橫王粲從軍畫陳琳草檄名知君
提健筆重振此嘉聲

聽蟬寄朐山孫明府

忽聽新蟬發客情其奈何西風起槐柳故國阻
煙波龍笛悲猶少巴猿恨未多不知陶靖節還
動此心麼

秋江夜泊寄劉鈞正字

閑憶詩人思倍勞維舟清夜泥風騷魚龍不動
澄江遠雲霧皆收皎月高潮滿釣舟迷浦嶼霜

繁野樹叫猿猱此時吟苦君知否雙鬢從他有
二毛

贈胸山孫明府

縣庭無事似山齋滿砌青青旋長苔閑撫素琴
曹吏散自烹新茗海僧來買將病鶴勞心養移
得閑花用意栽幾度訪君留我醉甕香皆值酒
新開

贈海上書記張濟負外

鵬霄休嘆志難伸貧病雖縈道且存阮瑀不能
專筆硯嵇康唯要樂琴樽春風滿院空歌枕芳

草侵堦獨閉門
劒有塵埃書有蠹
昔年心事共誰論

對竹

懶穿幽徑衝鳴鳥
忍踏清陰損翠苔
不似閑閑欹枕聽秋聲
如雨入軒來

送朐山孫明府赴壽陽幕府辟命

堪羨元戎虛右席
便承綸綍赴金臺
菊叢憔悴陶潛去
蓮幕光輝阮瑤來
好向樽罍陳妙畫
定應書檄播雄才
預愁別後相思處
月入閑窗遠夢迴

經廢宅

一夢奢華去不還
斷墻花發豈堪看
玉纖素綆知何處
金井梧枯碧甃寒

溪邊吟

鷓鴣雙飛下碧流
蓼花蘋穗正含秋
茜裙二八採蓮去
笑衝微雨上蘭舟

得故人消息

多難分離久相思
每淚垂夢歸殘月曉
信到落花時
未必乖良會
何當有後期
那堪樓上望煙水接天涯

芳草

二月正綿綿離情被爾牽四郊初過雨萬里正
鋪煙眷戀殘花惹留連醉客眠飄香是杜若最
憶楚江邊

江南春

千家事勝遊景物可忘憂水國樓臺晚春郊煙
雨收鷓鴣啼竹樹杜若媚汀洲永巷歌聲遠王
孫會莫愁

悼亡

巷深芳草細門靜綠楊低室邇人何處花殘月

又西武陵期已負巫峽夢終迷獨立銷魂久雙
雙好鳥啼

春晏寄從弟德潤

相思禁煙近樓上動吟魂水國春寒在人家暮
雨昏朱橋通竹樹香徑匝蘭蓀安得吾宗會高
歌醉一樽

贈致仕沈彬郎中

自言婚嫁畢塵事不關心老去詩魔在春來酒
病深山翁期採藥海月伴鳴琴多謝維舟處相
留接靜吟

憶溪居

竹軒臨水靜無塵別後見鷺入夢頻杜若孤蒲
煙雨歇一溪春色屬何人

登下蔡縣樓

長涯煙水又含秋吏散時時獨上樓信斷蘭臺
鄉國遠依稀王粲在荊州

下蔡春偶作

旅館飄飄類斷蓬悠悠心緒有誰同一宵風雨
花飛後萬里鄉關夢自通多難不堪容鬢改沃
愁惟怕酒杯空採蘭扇枕何時遂洗慮焚香叩

上穹

再遊洞神宮懷邵羽人有感

重向煙蘿省舊遊
因尋遺跡想浮丘
松頭鶴去三清遠
壇畔月明千古秋
泉落小池清復咽
雲從高嶠起還收
自慙未得冲虛術
白髮無情漸滿頭

秋雨

飄洒當窮巷
苔深落葉鋪
送寒來客館
滴夢在庭梧
逼砌蛩聲斷
侵窻燭影孤
遙思漁叟興
衰笠在江湖

又

竟日聲蕭颯兼風不暫闌竹窓秋睡美荻浦夜
漁寒地僻苔生易林疎鳥宿難誰知苦吟者坐
聽一燈殘

經古觀有感

古觀寥寥枕碧溪偶思前事立殘暉漆園化蝶
名空在柱史猶龍去不歸丹井泉枯苔鎖合醺
壇松折鶴來稀回頭因嘆浮生事夢裏光陰疾
若飛

吉水春暮訪蔡文慶處士留題

無事無憂鬢任蒼濁醪閑酌送韶光溟濛雨過
池塘暖狼藉花飛硯席香好古未嘗踈典冊懸
圖時要看瀟湘戀君清話難留處歸路迢迢又
夕陽

烈祖孝高挽歌

誰解叩乾闥音容去不還位方尊北極壽忽殞
南山鳳輦應難問龍舁不可攀千秋遺恨處雲
物鎖橋山

又

僊馭歸何處蒼蒼問且難華夷喧道德陵壠葬

衣冠御水穿城咽宮花泣露寒九疑消息斷空
望白雲端

贈海上觀音院文依上人

煙霞海邊寺高卧出門慵白日少來客清風生
古松虛窓從燕入壞屐任苔封幾度陪師話相
留到暮鍾

秋夕病中作

卧病當秋夕悠悠枕上情不堪拋月色無計避
蟲聲煎藥惟憂澁停燈又怕明曉臨清鑑裏應
有白鬢生

寄黃鸝秀才

長憶狂遊日惜春心恰同預愁花片落不遣酒
壺空草軟眠難捨鶯嬌聽莫窮如今千里隔搔
首對秋風

春日書懷寄胸山孫明府

一作邊城客閑門兩度春鶯花深院雨書劍滿
床塵紫閣期終負青雲道未伸猶憐陶靖節詩
酒每相親

柴司徒宅牡丹

暮春欄檻有佳期公子開顏乍折時翠幄密籠

鶯未識好香難掩蝶先知願陪妓女爭調樂欲
賞賓朋預課詩只恐却隨雲雨去隔年還是動
相思

贈王道者

混俗從教鬚似銀世人無分得相親槎流海上
波濤闊酒滿壺中天地春功就不看丹竈火性
閑時拂玉琴塵僊家變化誰能測只恐洪崖是
此身

春閨辭二首

塵昏菱鑑懶修容雙臉桃花落盡紅玉塞夢歸

殘燭在曉鶯牕外轉梧桐

邊無音信暗消魂
茜袖香裙積淚痕
海燕歸來門半掩
悠悠花落又黃昏

暮春懷故人

池館寂寥三月盡
落花重疊蓋莓苔
惜春眷戀不忍掃
感物心情無計開
夢斷美人沉信息
目穿長路倚樓臺
琅玕繡段安何得
流水浮雲共不迴

秋日登潤州城樓

虛樓一望極封疆
積雨晴來野景長
水接海門

鋪遠色稻連京口發秋香鳴蟬歷歷空相續歸
鳥翩翩自著行吟罷倚欄深有思清風留我到
斜陽

晚春客次偶吟

暫駐征輪野店間悠悠時節又春殘落花風急
宿醒解芳草雨昏春夢寒慙逐利名頭易白欲
眠雲水志猶難却憐村寺僧相引閑上虛樓共
倚欄

對雨寄朐山林番明府

竟日如絲不暫停莎堦閑聽滴秋聲斜飄虛閣

琴書潤冷逼幽窓夢寐清開戶只添搜句味看
山還阻上樓情遙知公退琴堂靜坐對蕭騷飲
興生

落花 六言

殘紅引動詩魔懷古牽情奈何半落銅臺月曉
亂飄金谷風多悠悠旋逐流水片片輕粘短莎
誰見長門深鎖黃昏細雨相和

鷺 六言

豪家五色泥香嚼得營巢太忙喧覺佳人晝夢
雙雙猶在雕梁

鶯六言

羽毛特異諸禽出谷堪聽好音薄暮欲棲何處
雨昏楊柳深深

宿山中寺

寄宿深山寺惟逢老病僧風吹幾世樹雲暗暮
秋燈瞑目忘塵慮談空入上乘明晨返名路何
計戀南能

海上載筆依韻酬左偃見寄

都城分別後海嶠夢魂迷吟興踈煙月邊情起
鼓鼙戍旗風颭小營柳霧籠低草檄無餘刃難

將阮瑀齊

春晚招曾從事

袞袞利名役常嗟聚會稀有心遊好景無術駐
殘暉南陌草爭茂西園花亂飛期君舉盃酒不
醉莫言歸

和易秀才春日見寄

每恨多流落吾徒不易親相逢千里客共醉百
花春小檻山當面閑堦柳拂塵何時卜西上明
月桂枝新

送黃秀才

雨餘飛絮亂相別思難任酒罷河橋晚帆開煙
水深蟾宮須展志漁艇莫牽心岐路從茲遠雙
魚信勿沉

庭竹

偶自山僧院移歸傍砌栽好風終日起幽鳥有
時來節月牽詩興籠煙伴酒杯南窗睡輕起蕭
颯雨聲迴

送戴秀才

已是殊鄉客送君重慘然河橋乍分首槐柳正
鳴蟬短棹離幽浦孤帆觸遠煙清朝重文物變

化莫遷延

病起作

閑齋病初起心緒復悠悠
開篋群書蠹聽蟬滿
樹秋詩魔還漸動藥債未能酬
爲憶前山色扶持上小樓

離家

送別人歸春日斜獨鞭羸馬
指天涯月生江上
鄉心動投宿狼忙近酒家

村行

極目青青隴麥齊野塘波闊下
見鷺鷥陽烏景暖

林桑密獨立閑聽戴勝啼

獻喬侍郎

位望誰能並當年志已伸人間傳鳳藻天上演
龍綸賈馬才無敵褒雄譽益臻除奸深繫念致
主迴忘身諫疏縱橫上危言果敢陳忠貞雖貫
世消長豈由人慷慨辭朝闕迢遙涉路塵千山
明夕照孤棹渡長津杜宇聲方切江離色正新
卷舒唯合道喜愠不勞神禪客陪清論漁翁作
近鄰靜吟窮野景狂醉養天真格論思名士興
情渴直臣九霄思復降比戶意皆忻却入鴛鴦

序終承顧問頻漏殘丹禁曉日暖玉墀春鑒物
心如水憂時鬢若銀惟期康庶事永要叙彝倫
貴賤知無間孤寒必許親幾多沉滯者拭目望
陶鈞

獻中書張舍人

僊桂從攀後人間播大名飛騰諧素志霄漢是
前程持憲威聲振司言品秩清簾開春酒醒月
上草麻成丹陛凌晨對清雲逐步生照人裴玉
瑩鑒物憲陂明下直無他事閑遊恣逸情林僧
開戶接溪叟掃苔迎煮茗山房冷垂綸野艇輕

神清宜放曠詩苦益縱橫餘刃時皆仰嘉謀衆
佇行四方觀啓沃必竟念孤平

海上和郎戩負外赴倅職

宋玉逢秋何起悲新恩委寄好開眉班昇駕驚
頻經歲任佐龔黃必暫時乍對煙霞吟海嶠應
思蘋蓼夢江湄一朝鳳詔重徵入鵬化那教尺
鷃知

又送赴闕

心似白雲歸帝鄉暫停良畫別龔黃煙波乍曉
浮蘭棹魂夢先飛近御香一路伴吟汀草綠幾

程清思水風涼想應敷對忠言後不放卿雲離
太陽

書郭判官幽齋壁

不妨公退尚清虛
荆得幽齋興有餘
要引好風清戶牖
旋栽新竹滿庭除
傾壺待客花開後
煮茗留僧月上初
更有野情堪愛處
石床苔蘚似匡廬

石碁局獻時宰

得從岳叟誠堪重
却獻臯夔事更宜
公退啓枰書院靜
日斜收子竹陰移
適情豈待樵柯爛
罷

局還應殺齒墮預想幽窓風雨夜一燈閑照覆
圖時

海城秋夕寄懷舍弟

鳥栖庭樹夜悠悠枕上誰知淚暗流千里夢魂
迷舊業一城砧杵搗殘秋窓間寂寂燈猶在簾
外蕭蕭雨未休早晚萊衣同著去免悲流落在
邊州

和夏侯秀才春日見寄

綿蠻黃鳥不堪聽觸目離愁怕酒醒雲散碧山
當晚檻雨催青蘚匝春庭尋芳懶向桃花塢垂

釣空思杜若汀。畫夢不成吟。有興揮毫書在枕，
邊幘。

送夏侯秀才

江村搖落暮蟬鳴。執手臨歧動別情。古岸相看
殘照在。片帆難駐好風生。牽吟一路逢山色。醒
睡長汀對月明。況是清朝至。公在預知喬木定
遷鶯。

江南重會友人感舊

江南重會面。聊話十年心。共立黃花畔。空驚素
髮侵。斜陽浮遠水。歸鳥下疎林。牽動詩魔處。涼

風村落砧

又

長江落照天物景似當年憶昔携村酒相將上
釣船狂歌紅蓼岸驚起白鷗眠今日趨名急臨
風一黯然

己未歲冬捧宣頭離下蔡

詔下如春煦巢南志不違空將感恩淚盡滴冒
寒衣覆載元容善形骸果得歸無心慙季路負
米覲親闈

哭舍弟二首

鴻鴈離群後成行憶日存誰知歸故里只得奠
吟魂虫蠹書盈篋人稀草擁門從茲長慟後獨
自奉晨昏

又

浮生多天枉惟爾最堪悲同氣未歸日慈親臨
老時舊詩傳海嶠舍弟有詩云夢斷海上遠新
塚枕江湄遺稚嗚嗚處黃昏繞總帷

書情寄詩友

默默誰知我徘徊野水邊詩情長若舊吾事更
無先芳草人稀地殘陽鴈過天靜思吟友外此

意復誰憐

讀蜀志

鼎分天地日先主力元微魚水從相得山河遂
有歸任賢無間忌報國盡神機草昧爭雄者君
臣似此稀

獻張拾遺

官資清貴近丹墀性格孤高世所稀金殿日聞
親鳳宸古嶂時展看漁磯酒醒虛閣秋簾捲吟
對踈篁夕鳥歸獻替頻陳忠譽播鵬霄萬里展
雄飛

獻中書湯舍人

慶雲呈瑞爲明時
演暢絲綸在紫微
鑾殿對時親舜日
鯉庭過處着萊衣
閑尋竹寺聽啼鳥
吟倚江樓戀落暉
隔座銀屏看是設
一門清貴古今稀

海上太守新荆東亭

使君心智杳難同
選勝開亭景莫窮
高敞軒窓迎海月
預栽花木待春風
靜披典籍堪師古
醉擁笙歌不礙公
滿徑苔紋踈雨後
入簷山色夕陽中
偏宜下榻延徐孺
最稱登門禮孔融
事簡

豈妨頻賞翫況當爲政有餘功

宮詞

門鎖簾垂月影斜翠華咫尺隔天涯香銷羅幌
不成夢背壁銀缸落盡花

又

金波寒透水精簾燒盡沈檀手自添風遞笙歌
門已掩翠華何處夜厭厭

採蓮女

晚涼含笑上蘭舟波底紅粧影欲浮陌上少年
休植足荷香深處不回頭

鍾陵春思

沉沉樓影月當午
冉冉風香花正開
芳草迢迢滿南陌
王孫何處不歸來

贈夏秀才

軒車紫陌競尋春
獨掩衡門病起身
步月怕傷三逕蘚
取琴因拂一床塵
明時儻有丹枝分
清鑑從他素髮新
況是青雲知己在
原思生計莫憂貧

夏日書依上人壁

門外塵飛暑氣濃
院中蕭索似山中
最憐煮茗茗

相留處踈竹當軒一榻風

下蔡春暮旅懷

柳過春霖絮亂飛
旅中懷抱獨恹恹
月生淮上雲初散
家在江南夢去迷
髮白每慙清鑑啓
心孤長怯子規啼
拜章爲養慈親急
願向明朝捧紫泥

捧宣頭許歸侍養

泥書捧處聖恩新
許覲庭闈養二親
螻蟻至微寧足數
未知何處荅穹旻

途中作 逢舊識聞老親所患不至加甚

煙波涉歷指家林。欲到家林懼却深。得信慈親
病瘵減。當時寬免採蘭心。

都下再會友人

誰言多難後。重會喜淹留。欲話關河夢。先驚鬢
髮秋。浮雲空冉冉。遠水自悠悠。多謝開青眼。携
壺共上樓。

登毗陵青山樓

高樓閑上對晴空。豁日開襟半日中。千里吳山
清不斷。一邊遼海浸無窮。人生歌笑開花露。世
界興亡落葉風。吟罷倚欄何限意。回頭城郭暮

煙籠

晉陵罷任寓居依韻和陳銳秀才見寄
掩門三逕莓苔綠車馬誰來陋巷間卧棄琴書
公幹病笑迎風月步兵閑當秋每謝菴清耳漸
老多慙酒借顏濟物未能伸一術敢於明代愛
青山

春苔

春霖催得鎖煙濃竹院莎齊逕小通誰愛落花
風味處莫愁門巷襯殘紅

夏雲

如峯形狀在西郊未見從龍上沈寥多謝好風
吹起後化爲甘雨濟田苗

書夏秀才幽居壁

永巷苔深戶半開床頭書劒積塵埃最憐小檻
踈篁晚幽鳥雙雙何處來

紅花

紅花顏色掩千花任是猩猩血未加染出輕羅
莫相貴古人崇儉誠奢華

安福縣秋吟寄陳銳祕書

縣庭事簡得餘功詩興秋來不可窮卧聽寒螿

莎砌月行衝落葉水村風愁髭漸去人前白醉
面猶憐鑑裏紅苦恨交親多契闊未知良會幾
時同

新喻縣酬王仲華少府見貽

事簡開樽有逸情共忻官舍月華清每慙花次
河陽景長愧琴無單父聲未泰黎元誠曠職縱
行謙直是虛名與君盡力行公道敢向昌朝俟
陟明

暮春有感寄宋維貞外

杜宇聲中老病心此心無計駐光陰西園雨過

好花盡南陌人稀芳草深
喧夢却嫌鶯語老伴
吟惟怕月輪沉
明年才候東風至
結駟期君預
去尋

題吉水縣廳前新栽小松

斲開幽澗蘚苔斑
移得孤根植砌前
影小未遮
官舍月翠濃猶帶舊山煙
群花解笑香寧久
衆木雖高節不堅
輸我婆娑欄檻內
晚風蕭颯學
幽泉

貽念法華經綬上人

五更初起掃松堂
瞑目先焚一炷香
念徹蓮經

誰得見千峯巖外曉蒼蒼

秋日途中

信步騰騰野岸邊
離家都爲利名牽
疎林一路斜陽裏
颯颯西風滿耳蟬

宿韋校書幽居

溪上高眠與鶴閑
閑罇留我待柴關
園林月白秋霖歇
一夜泉聲似故山

依韻和友人秋夕見寄

夕風庭葉落誰見
此時情不作關河
夢空聞砧杵聲會
須求至理何必歎
無成好約高僧宿
同

看海月生

吉水作尉酬高援秀才見贈

佐邑慙無術敢言貧與清風騷誰是王煙月自
關情卷箔當山色開窓就竹聲憐君惠嘉句資
我欲垂名

送智雄上人

忽起游方念飄然不可留未知携一錫乘興向
何州古岸春雲散遙天晚雨收想應重會面風
月又清秋

覽友人卷

新詩開卷處造化竭精英
雪霽楚山碧月高湘水清
初吟塵慮息再味古風生
自此寰區內喧騰二雅名

送人南遊

浪跡天涯去南荒必動情
草青虞帝廟雲暗夜郎城
越鳥驚鄉夢蠻風解宿醒
早思歸故里華髮等閒生

晉陵縣夏日作

事簡公庭靜開簾暑氣中
依經煎綠茗入竹就清風
至論招禪客忘機憶釣翁
晚涼安枕簟海

月出墻東

夕陽

影未沉山水面紅遙天雨過促征鴻魂銷舉子
不迴首閑照槐花驛路中

碧雲集卷中

碧雲集卷下

郵亭蚤起

郵舍殘燈在村林雞唱頻星河吟裏曉川陸望
中春舊友青雲貴殊鄉素髮新悠悠念行計難
更駐征輪

客中寒食

旅次經寒食思鄉淚濕巾音書天外斷桃李雨
中春欲飲都無緒唯吟似有因輸他郊郭外多
少踏青人

旅館秋夕

寥寥山館裏獨坐酒初醒舊業多年別秋霖一
夜聽砌蛩聲漸息窗燭影猶停蚤晚無他事休
如泛水萍

宿青溪米處士幽居

寄宿溪光裏夜涼高士家養風窓外竹叫月水
中蛙靜慮同搜句清神旋煮茶唯憂曉雞唱塵
裏事如麻

維舟秋浦逢故人張矩同泊

卸帆清夜碧江濱冉冉涼風動白蘋波上正吟
新霽月岸頭恰見故鄉人共驚別後霜侵鬢互

說年來疾逼身且飲一壺銷百恨會須遭遇識
通津

代別

明日鳴鞭天一涯悠悠此夕怯分離紅樓有恨
金波轉翠黛無言玉筯垂浮蟻不能迷遠意迴
紋從此寄相思花時定是慵開鑑獨向春風忍
掃眉

悼懷王喪妃

花綻花開事可驚暫來浮世返蓬瀛楚宮夢斷
雲空在洛浦神歸月自明香解返魂成浪語膠

能續斷是虛名音容寂寞春牢落誰會樓中獨
立情

酒醒

睡覺花陰芳草軟不知明月出墻東盃盤狼籍
人何處聚散空驚似夢中

送虞道士

煙霞聚散通三島星斗分明在一壺笑說餘杭
沽酒去蔡家重要會麻姑

懷舊夜吟寄趙杞

長笛聲中海月飛桃花零落滿庭墀
蒐銷事去

無尋處酒醒孤吟不寐時
萱草豈能忘積恨尺
書誰與達相思悠悠方寸何因解
明日江樓望
渺瀰

宿臨江驛

候館寥寥輟棹過酒醒無奈旅愁何
雨昏郊郭行人少葦暗汀洲宿鴈多
千祿已悲凋髮鬢結
茅終愧負煙蘿
篇章早晚逢知己
苦志忘形自有魔

途中柳

翠色晴來近長亭路去遙無人折
煙縷落日拂

溪橋

隔牆花

顏色尤難近
馨香不易通
朱門金鎖隔
空使怨春風

廣陵寒食夜

廣陵寒食夜
豪貴足佳期
紫陌人歸後
紅樓月上時
綺羅香未歇
絲竹韻猶遲
明日踏青興
輸他輕薄兒

寄廬山莊隱士

煙蘿擁竹關
物外自求安
逼枕溪聲近
當簷岳

色寒藥苗應自採琴調對誰彈待了浮名後依
君共掛冠

吉水寄閻侍御

時公調官瀑川

何處懷君切令人欲白頭偶尋花外寺獨立水
邊樓不得論休戚何因校獻酬吟餘興難盡風
笛起漁舟

送張惟貞少府之江陰

相送煙汀畔酒闌登小舟離京梅雨歇到邑早
蟬秋俗必期康濟詩誰平唱酬晚涼諸吏散海
月入

一作
上虛樓

鍾陵禁煙寄從弟

落絮飛花日又西
踏青無侶草萋萋
交親書斷竟不到
忍聽黃昏杜宇啼

夜泊江渚

水鄉明月上晴空
汀島香生杜若風
不是當年獨醒客
且沽村酒待漁翁

吉水縣依韻酬華松秀才見寄

官況蕭條在水村
吏歸無事好論文
枕歌獨聽殘春雨
夢去空尋五老雲
竹迳每憐和蘚步
禽聲偏愛隔花聞
詩情冷淡知音少
獨喜江皋得

見君

貽廬山清溪觀王尊師

霞帔星冠復杖藜
積年修鍊住靈溪
松軒睡覺冷雲起
石磴坐來春日西
採藥每尋巖逕遠
彈琴常到月輪低
鼎中龍虎功成後
海上三山去不迷

王昭君

蛾眉翻自累
萬里陷窮邊
滴淚胡風起
寬心漢月圓
飛塵長翳日
白草自連天
誰貢和親策
千秋污簡編

送姚端先輩歸寧

知君歸覲省稱意涉通津
解纜汀洲曉張帆煙水春
牽吟芳草遠貫酒亂花新
拜慶庭闈處蟾枝香滿身

江村晚秋作

高秋水村路隔岸見人家
好是經霜葉紅於帶露花
臨罾魚易得就店酒難賒
吟興胡能盡風清日又斜

蛩

月冷莎庭夜已深
百虫聲外有清音
詩情正苦

無眠處愧爾堦前相伴吟

感秋書事

官途憔悴雪生頭家計相牽未得休
紅蓼白蘋消息斷舊溪煙月負漁舟

訪廬山歸章禪伯

沉沉石室踈鍾後寂寂莎池片月明
多少學徒求妙法要於言下悟無生

廬山栖隱洞譚先生院留題

壇畔歸雲冷濕襟拂苔移石坐花陰
偶然醒得莊周夢始覺玄門興味深

江行值瀑風雨

風狂雨暗舟人懼
自委神明志不邪
投得葦灣波浪息
岸頭煙火近人家

杪秋夕吟懷寄宋維先輩

江島窮秋木葉稀
月高何處搗寒衣
苦嗟不見登龍客
此夜悠悠一夢飛

七夕

星河耿耿正新秋
絲竹千家列綵樓
可惜穿針方有興
纖纖初月苦難留

吉水作尉時酬閩侍御見寄

謬佐驅雞任常思賦鵬人時閩公謫官吉州未諧林下
約空感病來身鏢逕青苔老鋪階紅葉新相思
不可見猶喜得書頻

清溪逢張惟貞秀才

洞隱紅霞外房開碧嶂根昔年同鍊句幾夜共
聽猿考古書千卷忘憂酒一樽如今歸建業雅
道喜重論

送閩侍御歸闕

羨君乘紫詔歸路指通津鼓棹煙波暖還京雨
露新超朝丹禁曉聳轡九衢春自愧湮沉者隨

軒未有因

甲子歲罷吉水縣過鍾陵時暮春維舟
江渚謁柴太尉席上作

公侯延駐暫踟躕況值風光三月初
亂落盃盤花片小靜籠池閣柳陰疎
舟維南浦程雖阻飲預西園興有餘
却笑田家門下客當時容易數車魚

海上春夕旅懷寄左偃

柳過清明絮亂飛感時懷舊思悽悽
月生樓閣雲初散家在汀洲夢去迷
髮白每慙清鑑啓酒

醒長怯子規啼北山高卧風騷客安得同吟復
杖藜

江次維舟登古寺

輟棹因過古梵宮荒涼門徑鏤苔茸綠陰滿地
前朝樹清韻含風後殿鍾童子縱慵眠壞榻老
僧耽話指諸峯吟餘却返來時路回首盤桓尚
駐節

春日招宋維先輩

甕中竹葉今朝熟鑑裏桃花昨夜開爲報廣寒
攀桂客莫辭相訪共啣盃

吹笛兒

隴頭休聽月明中妙竹嘉音際會逢見爾樽前
吹一曲令人重憶許雲封

雲封開元
善笛者

所思

解珮當時在洛濱悠悠疑是夢中身自從物外
無消息花謝鶯啼近十春

吉水縣酬夏侯秀才見寄

啓鑑悠悠兩鬢蒼病來心緒易淒涼知音不到
吟還懶鐫印開簾又夕陽

和友人喜雪

鴈雪頻頻降成堆不可除半吟花莫並銷瘴藥
何如謝女詩成處素安睡起初深迷樵子徑冷
遍旅人居惹砌催罇俎飄窻濕簿書最宜樓上
望散亂滿空虛

感事呈所知

競愛松筠翠皆憐桃李芳如求濟世廣桑柘願
商量

送汪濤

知君別家後不免淚霑襟芳草千里路夕陽孤
客心花飛當野渡猿叫在煙岑霄漢知音在何

須恨陸沉

言志寄劉鈞秀才

童稚親儒墨時平喜道存酬身指書劒賦命委
乾坤秋爽鼓琴興月清搜句魂與君同此志終
待至公論

訪澄上人

尋師來靜境神骨覺清涼一餉逢秋雨相留坐
竹堂石渠堆敗葉莎砌咽寒蟬話到南能旨怡
然萬慮忘

經古寺

殿宇半墮摧門臨野水開雲凝何代樹草蔽此時臺
遶塔堆黃葉沿階積綠苔踟躕日將暮栖鳥巢來

送王道士遊東海

巨浸常牽夢雲遊豈覺勞遙空收晚雨虛閣看
秋濤必若思三島應須釣六鼈如通十洲去誰
信碧天高

貽青陽宰

徵賦常登限名山管最多吏閑民訟少時得訪

煙蘿

哭故主人陳太師

十年孤跡寄侯門入室升堂忝厚恩
遊遍春郊隨蒞旆飲殘秋月待金罇
車魚鄭重知難報吐握周旋不可論
長慟徘徊逝川上白楊蕭颯又黃昏

秋江夜泊寄劉鈞

萬里江山歛暮煙旅情當此獨悠然
沙汀月冷帆初卸葦岸風多人未眠
已聽漁翁歌別浦更堪鴈過遙天與
君共俟酬身了結侶波中寄釣船

和潯陽宰感舊絕句

追感古今情不已竹軒閑取史書看
欲親往哲無因見空樹林風襟袖寒

又

潯陽物景真難及練瀉澄江最好看
曾上虛樓吟倚檻五峯擎雪照人寒

又

園林春媚千花發爛熳如將畫障看
惟愛松筠多冷淡青青偏稱雪霜寒

又

知君百里鳴琴處公退千山盡日看政化有同
風偃草更將餘力拯孤寒

又

昔歲尋芳所得侶江堤物景盡情看就中吟戀
垂楊下撼起啼鶯晚吹寒

哭柴郎中

昔歲遭逢在海城曾容孤跡奉雙旌酒邊不厭
笙歌盛花下只愁風雨生綦接山亭松影晚吟
陪月檻露華清音塵自此無因問淚洒川波夕
照明

訪章禪老

比尋禪客叩禪機
澄却心如月在池
松下偶然醒一夢
却成無語問吾師

泊秋浦

葦岸風高宿鴈驚
維舟特地起鄉情
漁兒隔水吹橫笛
半夜空江月正明

閑居言懷

未達難隨衆
從他俗所憎
閑聽九秋雨
遠憶四明僧
病後倦吟笑
貧來踈友朋
寂寥元合道
未必是無能

舟次彭澤

飄泛經彭澤扁舟思莫窮
無人秋浪晚一岸蓼花風
鄉里夢漸遠交親書未通
今宵見圓月難坐冷光中

宿鍾山知覺院

宿投林下寺中夜覺神清
磬罷僧初定山空月又生
籠燈吐冷艷品樹起寒聲
待曉紅塵裏依前冒遠程

遊茅山

綠蘚深迎步紅霞爛滿衣
洞天應不遠鸞鶴向

人飛

又

茅許僊蹤在煙霞一境清
夷希何許叩松逕月
空明

鶴

九臯羽翼下晴空
萬里心難駐玉籠
清露滴時翹繅徑
白雲開處唳松風
歸當華表千年後
怨在瑤琴別操中
好共靈龜作儔侶
十洲三島逐僊翁

暮春吟懷寄姚端先輩

無柰詩魔旦夕生更堪芳草滿長汀故人還爽
花前約新月又生江上亭莊夢斷時燈欲燼蜀
魂啼處酒初醒何時得見登龍客隔却千山萬
仞青

送圖上人歸廬山

蓮宮舊隱塵埃外策杖臨風拂袖還踏雪獨尋
青嶂下聽猿重入白雲間蕭騷紅樹當門老斑
駁蒼苔鑠徑開預想松軒夜禪處虎溪圓月照
空山

送相里秀才之匡山國子監

氣秀情閑杳莫群廬山遊去志求文已能探虎
窮騷雅又欲囊螢就典墳目豁乍窺千里浪夢
寒初宿五峯雲業成早赴春闈約要使嘉名海
內聞

漁父

偶向蘆花深處行溪光山色晚來晴漁家開戶
相迎接稚子爭窺犬吠聲

又

雪鬢衰髯白布袍笑携頰鯉換村醪慙勸留我
宿溪上釣艇歸來明月高

旅次聞砧

砧杵誰家夜搗衣金風淅淅露微微月中獨坐
不成寐舊業經年未得歸

寄楊先生六言

僊翁別後無信應共煙霞卜隣莫把壺中祕訣
輕傳塵裏遊人浮生日月自急上境鶯花正春
安得一招琴酒與君共泛天津

對酒招陳昭用六言

花開葉落堪悲似水年光暗移身世都如夢役
是非空使神疲良圖有分終在所欲無勞妄思

幸有一壺清酒且來閑語希夷

旅夜聞笛

長笛起誰家秋涼夜漏賒一聲來枕上孤客在
天涯木末風微動窻前月漸斜暗牽詩思苦不
獨落梅花

送紹明上人之毗陵

忽起毗陵念飄然不可留聽蟬離古寺携錫上
扁舟月出沙汀冷風高葦岸秋回期端的否千
里路悠悠

再到山陽尋故人不遇

維舟登野岸因訪故人居亂後知何處荆榛匝
弊廬

又

欲問當年事耕人都不知空餘堤上柳依舊自
垂絲

寄廬山簡寂觀重道者

憶昔採芝廬岳頂清宮常接絳霄人玉書閑展
石樓曉瑤瑟醉彈琪樹春唯恨僊桃遲結實不
憂滄海易成塵似醒一夢歸凡世空向彤霞寄
夢頻

思湓渚舊居

昔歲曾居湓水頭
草堂吟嘯興何幽
迎僧常踏竹間蘚
愛月獨登溪上樓
寒翠入簷嵐岫曉
冷聲縈枕野泉秋
從拘官路無由到
昨夜分明夢去遊

思朐陽春遊感舊寄柴司徒

王孫昔日甚相親
共賞西園正媚春
醉卧如網芳草上
覺來花月影籠身

又

煙鋪芳草正綿綿
藉草傳盃似列僊
暫輟笙歌

且聯句含毫花下破香牋

又

南陌風和舞蝶狂惜春公子戀斜陽高歌飲罷
將迴轡衣上花兼百草香

又

春郊飲散暮煙收却引絲篁上翠樓紅袖歌長
金聲亂銀蟾飛出海東頭

又

昔年常接五陵狂洪飲花間數十場別後或驚
如夢覺音塵難問水茫茫

泉

潺潺青嶂底來處一何長漱石苔痕滑侵松鶴
夢涼泛花穿竹塢瀉月下蓮塘想得歸何處天
涯助渺茫

題徐五教池亭

名士池塘好塵中景恐無年來養鷗鷺夢不去
江湖泉脉通深澗風聲起短蘆驚魚跳

一作藻

行戲蝶上菰蒲泛泛容魚艇閑閑載酒壺漲痕
山雨過翠積岸苔鋪花影沉波底煙光入座隅
曉香憐杜若夜浸愛蟾蜍步逸心難厭看吟興

不辜憑君命竒筆爲我寫成圖

遙賦義興潛泉

見說靈泉好潺湲興莫窮誰當秋霽後獨聽月
明中澣石苔花潤隨流水葉紅何當化霖雨濟
物顯殊功

和毗陵糾曹昭用見寄

決獄多餘暇冥搜萬象空卷簾疎雨後鐫印夕
陽中還往多名士編題尚古風宦途知此味能
有幾人同

貽毗陵正勤禪院奉長老

隨緣駐瓶錫心已悟無生默坐煙霞散閑觀水
月明竹深風倍冷堂迥磬偏清願作傳燈者忘
言學淨名

舟次吉水逢蔡文慶秀才

別後音塵斷相逢又共吟雪霜今日鬢煙月舊
時心艤棹夕陽在聽鴻秋色深一罇開口笑不
必話昇沉

新喻縣偶寄彭仁正字

經年離象魏孤宦在南荒酒醒公齋冷雨多歸
夢長志難酬國澤術欠致民康吾子應相笑區

區道未光

和彭正字喜雪見寄

千門忻應瑞偏稱上樓看密洒虛窓曉狂飄大
野寒園深宜竹樹一作栢簾卷洽盃盤已作豐年
兆黎民意盡安

海上和柴軍使清明書事

清明時節好煙光英傑高吟興味長捧日即應
還禁衛當春何惜醉胸陽千山過雨難藏翠百
卉臨風不藉香却是旅人恓屑甚夜來魂夢到
家鄉

壬申歲承命之任淦陽再過廬山國學

感舊寄劉鈞明府

三十年前共苦心囊螢曾寄此煙岑讀書燈暗
嫌雲重搜句石平憐蘚深各歷官途悲聚散幾
看時一作流輩或浮沉再來物景還依舊風冷松
高猿狖吟

留題胡參卿秀才幽居

竹蔭庭除蘚色濃道心安逸寂寥中扣門時有
栖禪客灑一作渡酒多招採藥翁江近好聽菱芡
雨徑香偏愛蕙蘭風我慙名宦猶拘束脫屣心

情未得同

放鷺鷥

池塘多謝久淹留
長得霜翎放自由
好去蒹葭深處宿
月明應認舊江秋

柳絮

年年三月暮
散亂雜飛花
雨過微風起
狂飄千萬家

早春

一種和風至
千花未放妍
草心并柳眼
長是被恩先

春雲

陰去爲膏澤晴來媚曉空無心亦無滯舒卷在
東風

送姚端秀才遊毗陵

毗陵嘉景太湖邊才子經遊稱少年風弄青帘
沽酒市月明紅袖採蓮船若耶罨畫應相似若
溪石在越岫吳峯盡接連此去高吟須早返廣
寒丹桂莫遷延

和朐陽載筆魯裕見寄

燕臺多事每開顏相許論交淡薄間飲興共憐

芳草岸吟情同愛夕陽山露濃小逕蛩聲咽月
冷空庭竹影閑何事此時攀憶甚與君俱是別
鄉關

叙吟

往哲搜羅妙入神隋珠和璧未爲珍而今所得
慙難繼謬向平生著苦辛

又

成僻成魔二雅中每逢知己是亨通言之無罪
終難厭欲把風騷繼古風

梅花

群木方憎雪，開花長在先。
流鶯與舞蝶，不見許因緣。

冬中書懷寄惟真大師

自別吾師後，風騷道甚孤。
雪霜侵鬢髮，音信隔江湖。
擾擾悲時世，悠悠役夢途。
向公期盡節，多病怕傾壺。
賤跡雖慙滯，幽情忍使辜。
詩成天外句，碁覆夜中圖。
落壁燈花碎，飄窗雪片麤。
煮茶燒栗興，早晚復圍爐。

獻中書潘舍人

運叶半千數，天鍾許國臣。
鵬霄開羽翼，鳳闕演

絲綸顧問當清夜從容向紫宸立言成雅誥正
意叙彝倫朴素偕前哲馨香越搢紳褒辭光萬
代優旨重千鈞公退誰堪接清閑道是隣世間
身屬幻物外意通真弔往兼春夢文高賦復新
舍人有弔往文春
夢賦行於世也琴彈三峽水屏畫十洲春庭
冷鋪苔色池寒浸月輪竹風來枕簟藥氣上衣
巾茶譜傳溪叟碁經受羽人清虛雖得趣獻替
不妨陳杞梓呈材後神僊入侍頻孤寒皆有賴
中外亦同忻有士曾多難無門得望塵忙忙罹
險阻往往耗精神尋果巢枝願終全負米身遭

逢躬孝治寒塞值通津最慶清朝祿還霑白髮
親甘柔心旣遂虛薄報何因遠宦聯綿歷卑栖
夙夜勤良時空愛惜末路每悲辛骨立駒猶病
顏凋女尚貧而今諧顧遇尺蠖願求伸

碧雲集卷下

泰興季振宜滄葦氏珍藏

未見毛刻珣石雲集知多闕文及不獲見此集
宋刻初不解毛氏何以有缺想別有所本也迨
夏間坊友以毛藏舊抄奉來始知毛刻據
元本故所缺以此蓋宋元今各有面目在也
抄本中多有晉字校宋可與宋本註脩下者有
色墨初人陰重前賢手疏之意焉嗟乎此以与
月宵索折之望地同心之友眼下寥之可慕抑
可慨也時日宵於坊間見舊抄本甲乙集以
為子孫手校索直昂未之得予欲借觀焉吾
不一示少室不可笑因附記之以見予在古人因緣

何楊厚

楊樹遠